

梵網經古迹記

卷一之
卷三

興

支那內學院 成績品
第三五號
校勘門文句類
刻本二冊





梵網經古迹記卷第一

唐青丘沙門太賢集



將釋此經七門分別時處故機根故藏攝故翻釋
故宗趣故題名故本文故言時處者本卽盧舍那
佛在蓮華臺藏世界說末卽釋迦初成佛時於摩
伽陀國寂滅道場說言機根者有菩薩性得發心
者爲謗不信不得說故藏攝故者通菩薩藏毗奈
耶攝翻譯故者後秦有西域三藏鳩摩羅什此云
童壽持菩薩戒偏誦此品與義學沙門三千餘人
遂於逍遙園及長安草堂寺翻譯經論五十餘部

4424

最後因秦主欲受禁戒。別誦譯出。慧融等筆受。法藏師云。西域有十萬頌六十一品。具譯成三百餘卷。此經序云。可有一百二十卷。又上代諸德相傳云。真諦三藏將菩薩律藏擬來。此時於南海上船。船卽欲沒。省去餘物。仍猶不起。唯去律本。船方得進。真諦歎曰。菩薩戒律。漢地無緣。深可悲矣。又曇無讖三藏於西涼州。有沙門法進等。求讖受菩薩戒。并請戒本。讖曰。此國人羸。豈有堪爲菩薩道器。遂不與授。進等苦請。不獲所願。於佛像前立誓。求戒。七日纔滿。夢見彌勒親與授戒。并受戒本。并皆

誦得。覺已見讖。讖觀其相異。喟然歎曰。漢地亦有人矣。則與譯出戒本。與進夢誦文義相同。今別行地持戒本。首安歸敬偈者是。又聞西域諸小乘寺。以賓頭盧爲上座。諸大乘寺。以文殊師利爲上座。合眾共持菩薩戒。羯磨說戒。皆作菩薩法事。菩薩律藏常誦不絕。言宗趣者。語之所表。曰宗。宗之所歸。曰趣。此經正以心行爲宗。證覺利生以爲其趣。言心行者。略有二門。一教正行門。二誠惡行門。教正行者。卽經初說三賢十聖內證之行。誠惡行者。卽經後說十重四十八輕戒行。經自廣說如後。應

知所歸趣者亦有二門。一如來性門。二發趣相門。所趣能趣如次應知。如來性者卽真如性。如經寂滅者名爲一心。一心者名如來藏。謂眾生心似生無生之性。寥爲一心之海。似生之相。流成六道之波。如不增不減。經云。卽此法身。飄流生死。名爲眾生。卽此法身。修行諸度。名爲菩薩。卽此法身。住於彼岸。名爲諸佛。此復云何。生死之夢。唯有迷心。虛妄習氣。擾濁心故。或似眼等。或似色等。猶如翳眼所見空華。天地山河。雖無邊際。如夢所見。莫據之方。色等境風之所擊動。藏識海中。轉識浪起。湧於

六處。分別六塵。然色聲等。唯如夢塵。除心行相。都無所得。境旣卽心心。如境空也。迷故生死。悟故涅槃。是以空性名如來藏。第二發趣門者。如是內有如來性故。聞諸有情。同如來藏。妄念所飄。苦輪無際。生死大海。誓爲舟楫。不畏其中所受大苦。發不可壞無礙意樂。謂大菩提。若可得法。我亦丈夫。三大阿僧企耶。雖絕期之者。要可出之。無上正等菩提。雖遠誓之者。定有至也。蓋決無明之殼。掌融法界之雄。親近善士。聽聞正法。智慧爲母。方便爲父。廣攝眾生。爲自眷屬。空寂爲家。法喜爲婦。慈心爲

女至誠爲男。雖在居家不著三有。雖現受欲常住。梵行遊於衢路。利物爲心。欲成他義。能捨自命。詣講論處。導以大乘。入諸學堂。誘開童蒙。風前交友。必簡其師。月下忘懷。影中味道。草繫之功。自有風雲交遊。美色亦知其空。大悲般若之所輔翼。乘不住道。至心實際。但於諸心返照。自性明昧。位立佛菩薩。故云何名爲不住道耶。於空有邊不住。慧也。謂顛倒緣有世間相。旣顛倒有。卽離有無。如聖天言有非真有。故無亦非真無。謂於妄識似有而現。卽於證智似無所得。然於勝義非畢竟無。諸勝義

無俗亦無故。旣離有性。般若證空。亦離無性。大悲拔有。拔有之故。不住涅槃。證空之故。不住生死。不住二邊。異凡二乘。異凡小故。自發菩提。如瑜伽云。於空性相有失壞者。便爲失壞。一切大乘。是以菩薩行六度時。皆無所得。以爲方便。無所得者。卽不住道。若唯空有。便可得無。而復空空。故無所得。無所得。故三輪清淨。是名究竟修菩薩行。

梵網經盧遮那佛說菩薩心地法門品第十

言題名者。梵網經一部都名也。盧舍那佛說心地法門品第十者。此品別名也。梵者能淨之義。網者

攝有情義。謂此經者乃至有頂生死大海。拘持有情。終致無上寂滅之岸。無盡饒益。諸飢渴類。如世網故。爲顯此義。故諸梵王持羅網幢。供佛聽法。佛因此說世界差別。猶如網孔。佛教門亦如是。世界別者。須彌樹形覆世界等。徧涉入故。佛教門者。雖一味法。蘊界處等法門別故。是則如梵主網孔多網一。法王戒法當知亦爾。雖塵沙門終歸一道。萬行一門。所謂得意得意而行。皆稱法性。是故從喻名梵網經。經謂契經貫持爲義。貫義持生不散失故。盧舍那者。此云淨滿無障不淨無德不圓故。法

藏師云。梵本皆名毗盧舍那。此云光明徧照。智照法界身。應大機故。梵網字下標此名者。爲簡餘品。釋迦說故。佛謂覺者三義如常說。謂圓音巧應生解。唯識萬德。從此生長。名爲心地。出苦之津。入淨之戶。稱之法門。文義類別。故名爲品。此心地品。總有二門。一本師說故。二化傳說故。初中有五處。眾故。警覺故。啟問故。見問故。付屬故。

爾時釋迦牟尼佛。在第四禪地中。摩醯首羅天王宮。初者。經爾時至心地法品。述曰。處眾之中有三處所故。

與無量大梵天王不可說不可說菩薩眾。

大眾故。

說蓮華臺藏世界盧舍那佛所說心地法門品。

所說故。如文可解。

是時釋迦身放慧光所照。從此天王宮乃至蓮華臺藏世界。

經是時釋迦至亦生疑念。述曰。第二警覺中亦有
三放光故。

其中一切世界一切眾生各各相視歡喜快樂
眾喜故。

而未能知此光光何因何緣皆生疑念。無量天人亦
生疑念。

疑念故。如文可知。

爾時眾中玄通華光王菩薩從大莊嚴華光明三昧
起。以佛神力放金剛白雲色光光照一切世界。

經爾時眾中至爲何等相。述曰。第三啟問亦有三
文。起定故。集眾故。啟問故。玄通華光王者。所證真
理名玄。能證眞智曰通。能生大果名華。能除闇障
名光。三乘中勝名王。彼所起定華光亦爾。眾德莊
嚴名大莊嚴。金剛白雲色者。以不可壞無漏清白

含眾德水故標此色。光明非一故言光光。是中一切菩薩皆來集會。與共同心異口問此光光為何等相。

為何等相者問所為相。

是時釋迦即擊接此世界大眾還至蓮華臺藏世界百萬億紫金剛光明宮中。見盧舍那佛坐百萬蓮華赫赫光明座上。

經是時釋迦至光明座上。述曰。第四見問中有二見故問故。此初也。化歸本體言還至也。加力見勝如戒本疏。百萬億紫金剛光明宮者。如兜率天彌

勒菩薩五百億宮也。百萬蓮華者座蓮華也。

時釋迦及諸大眾一時禮敬盧舍那佛足下已。

經時釋迦至菩薩種子。述曰。第二問中有二問故。答故。此初也。

釋迦佛言。此世界中地及虛空一切眾生。為何因何緣得成菩薩。十地道當成佛果。為何等相。

有云三問。地者問有為行。虛空者問無為中行。眾生者備上二行眾生也。非也。據所居處問彼因果故。

如如佛性本原品中廣問一切菩薩種子。

菩薩種子餘品廣問。故今不問。舊疏云六處殊勝名爲種子。如地持

爾時盧舍那佛。卽大歡喜現虛空光體性本原成佛常住法身三昧示諸大眾。

經爾時至盧舍那佛。述曰。第二答中有二果故。因故。此答果也。大歡喜者見大利故。無分別智名虛空光照法性空故。正了因體亦名體性。智爲正因。故彼所依定名爲本原。此能顯成常住法身也。佛現此定示大眾也。

是諸佛子諦聽善思修行。我已百千阿僧祇劫修行心地以之爲因。初捨凡夫根本因。故修行心地以之爲因。捨凡夫等舉因答果也。

成等正覺號爲盧舍那住蓮華臺藏世界海。

成等正覺已下顯成佛相也。顯正依報及化相故。世界海者如智論云。數此三千大千世界如恆河沙。爲一世界。種數此種復至恆沙。爲一世界。海數此海復至十萬恆沙。爲一佛世界。雖在千葉中央臺上而言。在於世界海者。如化身在一閻浮州言在娑婆爲一佛土。二身遊化量亦爾故。

其臺周徧有千葉。一葉一世界。爲千世界。我化爲千

釋迦據千世界復就一葉世界復有百億須彌山百億日月百億四天下百億南閻浮提百億菩薩釋迦坐百億菩提樹下各說汝所問菩提薩埵心地其餘九百九十九釋迦各各現千百億釋迦亦復如是千葉上佛是吾化身千百億釋迦是千釋迦化身吾以為本源名為盧舍那佛。

千百億釋迦身土如戒本記釋。

勝莊戒本述記問曰此三種佛與佛如何相攝解云盧舍那佛是自受用千葉釋迦是他受用百億釋迦是變化身義寂戒本疏小乘說一三千界有一釋迦唯此四天下閻浮提中有金剛座實身成道餘唯遣化身度今大乘說三千界中有百億國百億國中皆有道樹金剛座百億釋迦各為主化。

爾時蓮華臺藏座上盧舍那佛廣答告千釋迦千百億釋迦所問心地法品。

經爾時蓮華至智身滿足述曰第二答因中有二略故廣故此初也。

諸佛當知堅信忍中十發趣心向果一捨心二戒心三忍心四進心五定心六慧心七願心八護心九喜心十頂心。

疏云堅信忍中明習種性解德法門亦名聞慧。

諸佛當知從是十發趣心入堅法忍中十長養心向果一慈心二悲心三喜心四捨心五施心六好語心

七益心八同心九定心十慧心。

堅法忍中明性種性。行德法門。亦名思慧。

諸佛當知。從是十長養心。入堅修忍中。十金剛心。向果。一信心。二念心。三迴向心。四達心。五直心。六不退心。七大乘心。八無相心。九慧心。十不壞心。

堅修忍中明道種性。行實法門。亦名修慧。

諸佛當知。從是十金剛心。入堅聖忍中。十地向果。一體性平等地。二體性善慧地。三體性光明地。四體性爾炎地。五體性慧照地。六體性華光地。七體性滿足地。八體性佛吼地。九體性華嚴地。十體性入佛界地。

堅聖忍中明聖種性。親證法門。名出世慧。

是四十法門品。我先爲菩薩時。修入佛果之根源。

此中三賢十聖。四十後次第解。故不釋之。

如是一切眾生。入發趣長養金剛十地。證當成果。無爲無相。大滿常住。十力十八不共。行法身智身滿足。證者登也。言無爲者。非煩惱業之所爲。故無相者。法身故。大滿者。智身故。常住者。自性無閒及相續故。

爾時蓮華臺藏世界。盧舍那佛。赫赫大光明座。上千葉上佛。千百億佛。一切世界佛。

經爾時蓮華臺至品中已開。述曰：第二廣中有二。請故答故。此初也。

是座中有一菩薩名華光王大智明菩薩。

諸佛會中有菩薩問釋名準前。凡此經文難可解者。佛佛相對梵語巧妙。猶如此間五言詩等。以漢語翻失。鈔難解。

從座而立白盧舍那佛言。世尊佛上略開十發趣。十長養。十金剛。十地名相。其一。一義中未可解了。唯願說之。唯願說之。妙極金剛寶藏。一切智門。如來百觀品中已開。

爾時盧舍那佛言。千佛諦聽。汝先言云。何義者發趣中。

經爾時至入空三昧。述曰：第二答中有四。如次廣說四十法門故。初亦有十。此發趣中初捨心也。菩薩請者。千佛所加故。今告言。千佛諦聽。知千佛眾未解了故。

若佛子。一切捨。

捨心三文。章門故。行相故。結成故。言一切捨者。舉章門也。

國土城邑田宅金銀明珠男女己身有爲諸物一切

捨無爲無相。

次行相中。謂國土等一切捨之。無爲無相者。標捨所捨之時。離三輪也。無爲者。人空故。無相者。法空故。

我人知見假會合成主者。造作我見。十二因緣無合無散。

次釋三輪。初施者空。謂卽我人知者見者。十二因緣假會合成故。能執彼主者造作之。我見者。於彼所緣十二因緣無合無散於境。無我故言無合。而有似我亦言無散。

無受者。十二入十八界五陰一切一合相。無我我所相。

次受者空。謂無受者。以蘊界處一合空相。無我我所相故。

假成諸法。若內一切法外一切法。不捨不受。

後施物空。假成諸法。若內身等若外財等一切之法空。無自之所捨。無彼受故。

菩薩爾時名如假會觀現前。故捨心入空三昧。

第三結言爾時觀成。如境假會能觀現前。

若佛子戒。

經若佛子至一道清淨。述曰。第二戒心。戒者舉章。非非戒。無受者十善戒。無師說法。欺盜乃至邪見。無集受者。慈良清直正實正見捨喜等。是十戒體性。

非非戒者。離有無邊重言非非。何者無受者十善戒。無師說法。謂無能說。寧有所說。受者授者及所受戒。不可得故。三輪空也。欺盜乃至邪見。無集受者。明所防惡體空。無集還屬眾緣。無定性故。欺者蔑也。蔑中之極。謂害命故。慈良等者。明能防戒體性亦空。一慈防殺也。二良防盜也。三清防姪也。四直防妄也。五正防酤酒。六實防讚毀。七正見防邪。見八捨防慳也。九喜防瞋也。舊疏云。等言等取悲防說過。

制止八倒。一切性離一道清淨。

防十惡時。制止有爲無爲八倒。有無性離一味清淨也。

若佛子。忍有無相慧體性。

經若佛子至不可得。述曰。第三忍心。忍者舉章。有無相慧體性者。總標真俗忍體。

一切空空忍。一切處忍。名無生行忍。一切處得名如苦忍。無量行一一名忍。

次辨行相差別言空空忍者緣勝義忍下此名爲無生行忍一切處忍者緣世俗忍下此名爲一切處得名如苦忍徧一切處如俗苦相而忍解故得名如苦者耐怨害等隨境目故如是真俗無量行相一一皆名忍者結也明真俗已。

無受無打無刀杖瞋心皆如如。

次明三輪自空無受彼空無打法性空故無刀杖無瞋心三輪一味言皆如如。

無一一諦一相無無相有無有相非非心相緣無緣相立住動止我人縛解一切法如。

事事無實言無一一諦理無二言諦一相理亦實空名無相而俗非無言有無有相次能所相對門非非心等明忍空相謂能忍心非都無故言非非心相似有緣慮無實緣故言緣無緣相立住等者空所忍境能打人等四威儀中染淨性空故言一切法如。

忍相不可得。

既能所空忍相不可得。

若佛子苦四威儀一切時行。

經若佛子至進分善根述曰第四精進心苦四威

儀一切時行者。以精進行舉章門也。行住等位無時不策故。

伏空假會法性。

次明行相。伏空假者。伏初二性。空謂徧計。假謂依他。會法性者。會圓成實。伏初事相。會真理故。

證無生山。而見一切有無。如有無。

空智德聚。名無生山。見有無者。有相名有無。相名無。如龍樹論。有爲名有無。爲名無。如有者。世俗似有。如無者。勝義似無。已上總觀一切法也。

大地青黃赤白。一切入。乃至。

大地青黃赤白。一切入者。十徧處也。包勝處。解脫等。故言乃至。已上別觀其功德門也。

三寶智性。

三寶智性者。大乘功德門也。以具三寶攝一切法。故明境界已。

一切信進道空。無生無作無慧。起空入世諦法。亦無二相。

次明功德。以一切信上昇進道。必三三昧。空慧爲門。無生者。無相相必生故。從勝義觀趣世俗。故言起空入世諦法。了真卽俗言。亦無二相。

續空心通達進分善根。

第三結言續空心通達進分善根者。所有進道皆空爲首。故言續前空心通達而進善根名進心也。若佛子寂滅無相。

經若佛子至生一切善。述曰第五定心寂滅無相者舉章門也。寂滅散動照無相故。

無相無量行無量心三昧。

次行相中無相無量行三昧者生空定也。唯有諸行無實我故無相無量心三昧者法空定也。唯有諸識無實法故并趣真空總名無相。

凡夫聖人無不入三昧體性相應一切以定力故。

凡夫聖人無不入三昧者八禪定也。彼二類定得淳熟故言體性相應於一切行以定力故諸障滅也。

我人作者受者一切縛見性是障因緣散風動心不寂而滅空空八倒無緣假靜慧觀一切假會念念寂滅。

謂我人受者人執也。一切縛者餘煩惱也。見性者且舉法執攝所知障也。皆是障定因緣散風動心者不生思惟皆心不寂而滅空空及以八倒無攀

緣也。假靜慧觀者學觀有情法。假定慧由此定慧。一切假會苦諦伏滅。

受一切三界果。罪性皆由定滅而生一切善。

能受三界罪性集滅言而生一切善者。道資糧也。

若佛子。空慧。

經若佛子。至爲慧用故。述曰。第六慧心。空慧者。舉第六度。

非無緣智體名心分別一切法。假名主者與道通同。明行相中。非無緣者。標有所依緣也。慧亦無性。依他起故。何爲所依。謂能知體名之爲心。了別一切。

法假名主者。心王性故。與道通同者。與慧相應故。卽住聖胎。

取果行。因入聖捨凡滅罪起福縛解盡是體性功用。一切見常樂我淨煩惱慧性不明。故以慧爲首修。不可說觀慧入中道一諦。

當入聖等。盡是慧心體性功用也。一切能執四倒煩惱。皆由染慧性不明故。故對治之。以慧爲首修。不可說種種聞慧以爲方便。入於中道一真諦也。其無明障慧非相。非來於緣。非罪非八倒無生滅。慧光明光爲照樂虛。

次明障空。謂其無明能障慧者。離眾緣合。無自相。故言非相。不卽緣故。非來於緣。旣無自性。故非罪。非八倒無生滅也。由此慧明照而樂空。明真實智已。

方便轉變神通。以智體性所爲慧用故。

更智方便轉變神通。亦智體性所爲。以慧用故。

若佛子。願願。大求一切求。

經若佛子。至一切行本原。述曰。第七願心。願願大求一切求者。舉章門也。雙求二利。故言願願求斷名大求。求智名一切求。

以果行因。故願心連。願心連相續。百劫得佛滅罪。

明行相中。以求遠果。修行因故。願心連也。必由願心連相續。故百劫得佛卽滅罪也。百謂多義。罪卽生死災患聚故。

求求至心無生空。一願觀觀入定照無量見縛。以求心故解脫。

專注連求法空一相。故言求求至心於無生空。一者一相。所謂無相乘願增觀而入定照。則無量見縛。以求願心故得解脫。

無量妙行以求心成。菩提無量功德以求爲本。初發

求心中間修道行滿願故佛果便成觀一諦中道非陰非界非沒生見見非解慧。

其能證行以求心成。由此菩提無量功德以願爲本。既成佛已圓證法界離有無邊言觀一諦中道也。萬德相融能照智分。所照法界雖無差別非如二乘灰身滅智亦言非沒。親圓證已於後得智起無量用言生見見。然不謂言我有所作言非解慧。是願體性一切行本源。

結文可解。

若佛子。護三寶護一切行功德。

經若佛子至觀法亦爾。述曰。第八護心之中。護三寶護一切行功德者。舉章門也。以護所依及自行使外道八倒惡邪見不燒正信。

次明行相。初護外道不令燒正信者。護三寶也。以無相行伏倒心故。

滅我縛見縛無生。照達二諦觀心現前。

滅我縛見縛無生等者。護自行也。伏煩惱障言滅我縛。伏所知障言見縛無生。

以護根本。無相護。護空無作無相。以心慧連慧連。入無生空道智道皆明光明光。護觀入空假分分。幻化

幻化所起如無如無。

以何行相如此護耶。謂護根本三寶。以無相行護。護自三空門。以心慧連慧連等者。一空相資故言。慧連慧連。如是相連入無生也。止道觀道則明光。明光以伏二障無罣礙故。如是護觀入於空境。俗假相別故。言分分似我似法。妄識中似有故。言幻化。幻化所起俗相性空空智中似無故。言如無如無。

法體集散不可護。觀法亦爾。

以下結云。緣合所起言法體集。還屬眾緣言法體散。無定自性言不可護。如所觀理能觀亦爾。

若佛子。見他人得樂常生喜悅。

經若佛子。至一切法。述曰。第九喜心。見他人得樂常生喜悅者。舉章門也。

及一切物假空照寂。而不入有爲不無寂然大樂無合。有受而化有法而見。

及一切下。明行相也。假謂依他空。謂徧計徧伏二相言。及一切。二相不現名爲照寂。不見初二性言。不入有爲。眞如影現言不無寂然。內證樂中境智俱空。故言大樂無合。般若雖證空大悲猶化物攀。

緣有境故。言有受而化有法而見也。

玄假法性平等一觀心心行多聞一切佛行功德無相喜智心心生念而靜照。

玄假法性等者。見二諦性平等一觀心心中行也。玄者勝義假者世俗。般若大悲而相融故多聞一切佛行功德等者。多聞果德及因行德。普以無相隨喜之智連生正念而專照也。既一無生佛即我故。

樂心緣一切法。

以下結云樂心緣一切法者。離嫉妒等喜悅緣故。若佛子是人最上智。

經若佛子至光品廣說。述曰第十頂心是人最上智者舉章門也。

滅無我輪見疑身一切瞋等如頂。觀連觀連如頂。法界中因果如如一道最勝上如頂。如人頂。

次釋名義前九心上。三義如頂。一滅障如頂。言我輪者執我爲首。輪迴煩惱利見疑身。及以鈍品瞋等煩惱皆滅無。故勝如頂也。二智勝如頂。最上智連如頂故。三境勝如頂。周徧法界因果圓融如如一道最如頂故。如人頂者。總喻上三也。

非非身見六十二見。五眾生滅神我主人動轉屈申。無受。無行可捉縛者。是人爾時入內空直道。

次明行相不同身見六十二見。簡二類見。故言非非。五眾卽五蘊也。於蘊刹那刹那生滅。謬執神我體常流轉。觀識蘊空也。多計識蘊爲我相。故無受者。觀受蘊空。無行可捉縛者。觀餘三蘊空也。行卽行蘊。無可捉者。色蘊空。故無可縛者。想蘊空。故妄想縛本。故如契經云。識如幻化。乃至色如聚沫。言入內空直道者。卽入內門純一味道。

心心眾生不見緣。不見非緣。住頂三昧寂滅定。發行趣道。性實我人常見。八倒生緣不二法門。由此不受八難。幻化果畢竟不受。唯一眾生。

上明般若。次明大悲。刹那刹那於諸眾生不見有緣。不見非緣。恆以無緣大悲攀緣住頂三昧寂滅定。亦發加行於趣證道。爾時設有性實我人常見八倒生者。則緣不二法門。性實見者法執也。我人見者生執也。由此不受八難者。三途等也。幻化果畢竟不受者。道分善根不造生死引業。故同體大悲離我無化。故言唯一眾生。

去來坐立修行滅罪除十惡生十善。入道正人正智。

正行。

四威儀中滅惡生善。言入道者。總句。餘三別句。滿十解位。名爲正人。立福智資糧。名正智正行。行卽福也。

菩薩達觀現前。不受六道果。必不退佛種性中。生生入佛家。不離正信。

下總結。言菩薩達觀現前。故不受六道果。必不退於佛種性中也。以背流轉向還滅。故生生入佛家者。十住毗婆沙云。以真如爲佛家。相應解成。故言入也。

上十天光品廣說。

十天光品者。指上品也。

盧舍那佛言。千佛諦聽。汝先問長養十心者。

經盧舍那至體性三昧。述曰。第二十長養中。牒問可知。

若佛子。常行慈心生樂因已。

此初慈心中。常行慈心生樂因已者。舉章門也。

於無我智中。樂相應觀入法。受想行識色等大法中。無生無住無滅如幻如化如無二故。一切修行成法輪。

才系系下言卷一
慈與樂故。此無緣慈。慈行既成。自亦樂俱入所緣法。謂卽五蘊大真法中空蘊三相。如幻如化真如無二故。則堪當成聖道法輪。

化被一切能生正信。不由魔教。亦能使一切眾生得慈樂果。非實非善惡果。

言化被已下。教他生信大悲門故。言非實者。謂所利益信心空故。非善惡果者。謂所安樂樂果空故。解空體性三昧。

言解空體性三昧者。結慈行成也。

若佛子。以悲空空無相。

經若佛子。至起大悲。述曰。第二悲心中。以悲空空無相者。舉章門也。有性空故。言空空。亦空故。言空空相。

悲緣行道自滅一切苦。於一切眾生無量苦中生智。不殺生緣。不殺法緣。不著我緣故。常行不殺不盜不淫。一切眾生不惱。

次明行相。悲緣行道自滅一切苦者。標句也。緣謂攀緣。如下有情緣等三故。如何滅苦。先於眾生苦中生智。生何等智。謂有三種。一有情緣如經不殺生緣故。二法緣悲如經不殺法緣故。三無緣悲如

經不著我緣故。由此於一切眾生不惱也。

發菩提心者。於空見一切法如實相。種性行中生道。智心。於六親六惡親惡三品中。與上樂智。上惡緣中。九品得樂果。空現時。自身他一切眾生平等。

次明行相。夫發大悲心者。於空性中見一切法如實性。若失壞空性。則失一切大乘故。種性行中生道。智心者。出斯位行也。如仁王云。銀輪三天性。種性故。父等六善於我為親。翻彼六惡於我為惡。彼二各有上中下品。欲與上樂而拔苦也。且上品惡隨器各得九品樂者。即觀果空。欲與上樂而九品

別樂還屬器無自性。故樂果空相慈心中現。

一樂起大悲。

以一樂行。引起大悲也。

若佛子。悅喜無生心時。

經若佛子。至苦故喜。述曰。第三喜心中。喜悅無生。人心時者。舉章門也。喜心觀空。名無生心。

種性體相道智。空空喜心。不著我所出沒三世因果。無集。一切有入空觀成。等喜一切眾生。

種性體相道智者。位體相也。自他空故。名為空空。猶隨喜他。名為喜心。此有二種。一者性空不著我。

及所故。二者法空達流轉無集故。出沒即流轉義。諸緣所起還屬眾緣無一定相。故言無集。爾時一切萬有入空。即觀行成。以同體之喜等喜。一切起空入道。捨惡知識。求善知識。示我好道。使諸眾生入佛法家。法中常起歡喜。入法位中。復是諸眾生入正信。

起此空觀。入有相道。遠邪近正。正謂示我好道。及使眾生入佛法家。得法在懷。行體怡悅。故言法中常起歡喜。自入法位。復於他人正中隨喜也。捨邪見。背六道苦。故喜。

若佛子。常生捨心。

經若佛子。至常修其捨。述曰。第四捨心中。常生捨心者。舉章門也。

無造無相空法中。如虛空。於善惡有見無見。罪福二中平等。一照非人。非我所心。而自他體性不可得。為大捨。

無造無相空法中。三空門也。如虛空者。喻於三空。無障礙。行於善等。中法空。人空。為大捨。捨謂治染。且顯治貪。

及自身肉手足男女國城。如幻化水流燈炎。一切捨。

幻等如次喻虛流轉及剎那滅。

而無生心常修其捨。

無生心者捨心空故。雖空恆進言常修捨。

若佛子能以施心被一切眾生。

經若佛子至現前行。述曰第五施心中能以施心被一切眾生者舉章門也。

身施口施意施財施法施教導一切眾生。內身外身國城男女田宅皆如如相乃至無念財物受者施者亦內亦外無合無散無心行化。達理達施無心行化者無執著故。達理達施者了真俗性。

一切相現在前行。

言一切相現在行者施行成就也。

若佛子入體性愛語三昧。

經若佛子至發起善根。述曰第六愛語心中入體性愛語三昧者舉章門也。體性者真性也。麤語軟語皆趣勝義可愛樂故名愛語也。

第一義諦法語義一切實語言皆順一語調和一切眾生心無瞋無諍一切法空智無緣常生愛心行順佛意亦順一切他人以聖法語教諸眾生。

實諦之中法語之義實語之言皆順純淨一語之

門能調一切乃至無諍發語之智法空無緣而生
恩愛之心。

常行如心發起善根。

下總結言常行如心發起善根者稱真心也。

梵網經古迹記卷第一

梵網經古迹記卷第二

唐青丘沙門太賢集

若佛子利益心時。

經若佛子至但益人爲利。述曰第七利行心也。利
益心時者舉章門也。

以實智體性廣行智道。集一切明炎法門。集觀行七
財。前人得利故。益受身命而人利益三昧。

實智體性者所緣真如也。廣行智道者能緣智慧
也。集一切明炎法門者集智資糧故。集觀行七財
者集福資糧故。用之益人言前人得利時還益己

法身慧命言益受身命。

疑一切身一切口一切意而震動大世界。

言一切意者作用多故皆令他人次第行成也。

一切所爲所作他人入法種空種道種中得益得樂果。

言法種者習種行成故空種者性種行成故道種者道種行成故皆生佛果故言種也。令他人入此三十心中。次云得益者證地上際行故得樂果者得佛後際果也。

隨形六道無量苦惱之事不以爲患。

形居六道處苦甘心。

但益人爲利。

下結意者但益他人爲己利故。

若佛子以道性智同空無生法中。

經若佛子至同法三昧。述曰第八同事心中以道性智同空無生法者舉章門也。謂此位智稱空理也。

以無我智同生無二空同源境諸法如相常生常住常滅。

次明行相生無二者生空眞如也智行相應言同

於彼。又法空行同最本源法空如相。世閒諸法以恆轉故言常生常住常滅。於此流轉隨入事同。

世法相續流轉無量而能現無量形身色心等業入諸六道一切事同。空同無生我同無物而分身散形。故入同法三昧。

雖了法空同而無生。及自他我同而無物。猶爲益物入同事三昧。

若佛子復從定心。

經若佛子至而不可得。述曰第九定心中復從定心者舉章門也。

觀慧證空心心靜緣於我所法。識界色界中而不動轉。

次明行相。從定發慧念念寂照離戲論故。於我所法者卽所徧計十八界也。此文可言我法所法謂七心界名爲我法。多計識蘊以爲我故。十根塵色法處色等名爲所法。下出體云。識界色界於此不著。言不動轉。

逆順出沒故常入百三昧。十禪支以一念智作是見一切我人若內若外眾生種子皆無合散。

十禪支者一尋二伺三喜四樂五心一境性六內

齊續經古言卷一
三
等淨七捨八念九正知十不苦不樂受。以一念智
雙觀二空。一切我人無合散者。觀生空故。內外現
種無合散者。觀法空故。言眾生者。諸現行也。無一
定性言無合緣。合似有言無散。

集成起作而不可得。

所以者何。眾緣集成之所起。作求彼實性不可得
故。

若佛子。作慧見心。

經若佛子。至百法明門。述曰。第十慧心中。作慧見
心者。舉章門也。

觀諸邪見結患等縛。無決定體性。順忍空同。故非陰
非界。非入非眾生。非一我非因果。非三世法。

纏名爲結。隨眠名患。眾苦本故。言順忍者。境順智
故。

慧性起光光。一炎明明。見虛無受。

慧性起光光者。運運照故。一炎明明者。一體多用
故。見虛無受者。緣空不執故。

其慧方便生長養心。是心入起空空道。發無生心。

總結云。其慧方便者。慧心善巧故。能生此位十長
養心也。是心入空理起空道故。雜修智悲堪發無

生聖心之因也。

上千海眼王品已說心百法明門。

盧舍那佛言。千佛諦聽。汝先言金剛種子有十心。

經盧舍那至名無相信。述曰。第三十金剛也。初發

心趣。次長養已。今不可壞喻金剛故。

若佛子。信者。

此初心中。信者。舉章門也。

一切行以信為首。眾德根本。不起外道邪見。心諸見

名著。結有造業。必不受人空無為法中。

諸見名著者。訓釋見義。以執著故。結有造業者。招

苦造集故。於此必不受。方入空無為。

三相無。無無生。無生住。住住無滅。滅無。

言三相無者。總標三相寂滅。無無生下。別破三相

謂生住滅有能所相。今雙空故。重言無無。遣能所

生言無無生。此文可言無無生故。無生之住。無生

住故。住所住無。住住無故。滅滅亦無。

有一切法空。世諦第一義諦智盡滅。異空。色空。細心

心空。細心心空。故信信寂滅。無體性和合亦無依。

言有一切法空者。存法無我真如也。遮滅過故。言

盡滅異空者。一諦智泯。故言盡滅。猶有分見。亦言

異空。色空者。色陰空也。細心心空者。四陰空也。三世心空故。二諦信寂滅。無體性和合。還屬眾緣。無一定性故。所屬緣亦空故。言亦無依。然主者。我人名用。三界假我。我無得集相故。名無相信。

次總結言。然主者。我人名用者。舉實我體名字功能也。三界假我者。人法二假我也。無得集相者。實我假我無可得。一聚集相故。既人法空。名無相信。

若佛子。作念。

經若佛子。至亦如是。述曰。第二念心中。作念者。舉章門也。

六念常覺。乃至常施。第一義諦。

六念中常覺者。念佛也。乃至攝法僧戒三也。言常施者。念施也。觀彼實性。皆言常也。第一義諦者。念天也。佛常涅槃果。第一義天故。

空無著無解。生住滅相不動。不倒去來。

言空無著無解等者。觀所念境。空無可縛著。況有解脫耶。既空三相之所。不動不倒去來。以迹絕故。而於諸業受者。一合相迴向。入法界智。

然於作者一合真相還歸本際入法界智。

慧慧相乘乘寂滅炎炎無常。

運運增明言慧慧相乘運運會空言乘乘寂滅念
念泯相言炎炎無常。

光光無無生生不起。

上古傳說慧慧住相名光光即彼滅相名無無後
後生相名生生相雖遷流然性不起熏修力故。

轉易空道變前轉後變變轉化化化轉轉轉變同時
同住炎炎一相生滅一時已變未變變變化。

轉易空道變捨前劣轉得後勝運運增長本有劣

無故言變變本無勝有故言轉化展轉勝生言化

化轉轉如是後轉前變之時如稱兩頭同時住也。

炎炎一相者念念雖別而恆一相所謂無相生滅

一時者生滅雖異融於一念次例生滅三世亦如

是已變者過去未變者未來變者正變即現在也。

三世同時故言變化。

亦得一受亦如是。

亦得一受受謂容受一念融故。

若佛子深心者。

經若佛子至心解脫述曰第三深心中深心者舉

章門也。即迴向心也。期遠深故。

第一義空。

第一義空者標句。

於實法空智照有實諦。業道相續因緣中道名為實諦。

於徧計空智照有中道。謂十二支非常非斷名為實諦。

假名諸法我人主者名為世諦。餅有情等名為俗諦。

於此二有諦深深入空而無去來。幻化受果而無受。

於此二諦了二空故。重言深深出入相寂言無去來。結中道言十二因緣。幻化受果故離滅邊而無實受。故離增邊。是故伏障心解脫也。

故深深心解脫。若佛子達照者。

經若佛子至不可得。述曰。第四達心中。達照者。舉章門也。

忍順一切實性。性性無縛無解。無礙法達義達辭達教化達。

忍順一切實性者。印順真俗無倒性也。俗性無縛。

真性無解言無礙者總標也。法達等四別出也。如
次法義辭辨無礙無礙名達。

三世因果眾生根行。如如不合不散無實用無假用
無名用用一切空空空照達空名爲通達一切法
空。

所達三世因果所化眾生根行。如如不增不減體
性既空無實法用無假法用無假名用既無三用
故言用用空彼體用空亦空故言空空如處緣空
能照亦空是名通達一切法空。

空空如如相不可得。

結智行相云空空如如相不可得。

若佛子直心者。

經若佛子至而不受。述曰第五直心中直者舉章
門也行無邪曲故名直心。

直照取緣神我入無生智無明神我空空空中空空
理心在有在無而不壞道種子。

言直照者釋直心名次出境體言取緣我境入無
生理之智名直心也由無明力所計神我二空中
泯雖其緣二空理之心在無我有在實我無然不
著有無不失壞空理空理名爲佛道種子如瑜伽

云真如所緣緣種子故。不失壞空名大乘故。
無漏中道一觀而教化一切十方眾生。轉一切眾生
皆薩婆若空直直性。

相似無漏中道一味觀而教化十方。轉一切眾生
者。轉凡向聖也。轉眾生時皆以薩婆若空直直性
也。以趣菩提真空性故。二空正性名直直性。
直行於空三界主者。結縛而不受。

次總結言。直行於空故。三界縛而不受也。煩惱根
本名爲主者。

若佛子不退心者。

經若佛子至一道一照。述曰第六不退中。不退心
者。舉章門也。唯進無慮。名不退心。

不入一切凡夫地。不起新長養諸見。亦復不起習因。
相似我人。入三界業。亦行空位而不退。

古師云。凡夫有二。習種已前名外凡夫。地前三十
心名內凡夫。今不退人於外凡也。不起新長養諸
見者。伏分別惑。故不起習因。相似我人者。漸伏俱
生故。雖入三界業中流轉。而亦行空位不退也。

解脫於第一中道一合行。故行不退。

又解脫現行障。於第一中道境智合行。故行不退。

也。

本際無二故而不念退。

又於本性空正念不退也。

空生觀智如如相續乘乘心入不二。

證空生解言空生觀智也。如如相續如是如是乘勝心入於不二。

常空生心一道一淨爲不退一道一照。

結云常時於空生心。一乘純淨。此爲不退一道一照也。

若佛子獨大乘心者。

經若佛子至得度苦海。述曰。第七大乘心中。獨大乘心者。舉章門也。獨謂不共義。解解一空故。一切行心名一乘。

次明乘行。運載功中。解解一空者。雙依二空證一真法界故。法界同故。了三乘行皆一乘也。

乘一空智智乘行乘乘智。心心任載任用任載任一。切眾生。

如是菩薩乘一空智雙修福智名智乘行乘也。言乘智者。牒上顯運。謂乘者。牒上所修福智。智者。牒上能修空智。言心心者。念念也。剎那剎那任載行。

者。任用自利。任載行者。任度眾生。

度三界河。結縛河。生滅河。行者坐乘。任用載用智心。趣入佛海。

言度三界河者。度苦也。度結縛河者。度惑也。度生滅河者。度業也。是故行者坐乘如上。任用載用智相應心。趣入佛海也。

故一切眾生未得空智。任用不名爲大乘。但名乘得度苦海。

故諸眾生未得乘用。但名乘所得度之海。

若佛子。無相心者。

經若佛子。至故無相心。述曰。第八無相心中。無相心者。舉章門也。

忘相解脫。照般若波羅蜜無二。一切結業三世法。如一如諦而行於無生空。

次明行相。謂忘相心。照實相般若無二。復於一切煩惱業果。如一如諦亦行無生空。

自知得成佛。一切佛是我等者。一切賢聖是我同學。自知成佛了平等故。佛是我性等者。賢聖是我行同者。

皆同無生空。故無相心。

結言皆同無生空故無相心。

若佛子。如如慧者。

經若佛子。至入一切法。述曰。第九慧心中。如如慧者。舉章門也。

無量法界無集無受生。生生煩惱而不可縛。

次舉所緣。云無量法界無集。因無受生果。亦非生。生煩惱所縛。

一切法門。一切賢所行道。一切聖所觀法。所有亦如是。

如知勝義境。世俗一切法門。三賢所行道。十聖所

觀法。亦如是知。

一切佛教化方便法。我皆集在中心。外道一切論邪。定功用。幻化魔說。佛說皆分別。

非但所知外化方便。皆集心中。達正方便故。外道邪見功用。幻化魔說。及與佛說差別之中。皆分別也。

入二諦處。非一非二。非有陰界入。是慧光明。

入二諦處。諦故非一。解故非二。非有陰界入。卽是慧光之所映奪。

光明照性入一切法。

然慧光照性卽入一切法以證真時思惟一切法故。

若佛子不壞心者。

經若佛子至廣說述曰第十不壞心者舉章門也。入聖地智近解脫但得道正門明菩提心伏忍順空八魔不壞。

次明行相中。堪入聖智近於分別二障解脫。但得聖道方便正門。於此終心開四善根明得明增故。名明菩提心。伏忍之中極順空理。八魔者。一苦。二空。三無常。四無我。五生。六老。七病。八死。非此八種之所惑亂。傳說如此。應厭生死欣小涅槃退菩提心立爲魔也。明自分行已。

眾聖摩頂諸佛勸發入摩頂三昧。

次明勝分眾聖與力。言諸佛勸發者佛見此人而發悟故。彼受加已入摩頂定得三業加力。

放身光光照十方佛土入佛儀神出沒自在動大千界。

初身加力中自身放光入佛儀神者。傳說習佛威儀行也。

與平等地心無二無別而非中觀智道以三昧力故。

光中見佛無量國土。

次意加力與證地心相似無別而非實證中觀智道此真門也。又以定力世俗門中見無量土。

現爲說法。

後語加力現爲說法。

爾時卽得頂三昧。證虛空平等地。總持法門。聖行滿足。

爾時頂善所依三昧。登所取空平等地。中攝相歸識。總持滿足。

心心行空。空空慧中。道無相照。故一切相滅。入金剛三昧門。入一切行門。入虛空平等地。

心心行空者。下忍之時。卽所取空。故言空空。慧中道無相照者。初空中。忍順能取空。後空上。忍卽能取空。更無餘相。言無相照。由此世第一法位。中雙印二空。故言一切相滅。此無閒定。永無退還。言金剛三昧門。從此入聖。於一身中。修一切行。故言入一切行門。卽入初地。虛空平等地也。

如佛華經中廣說。

佛華經者。指餘經也。

盧舍那佛言。千佛諦聽。汝先問地者。有何義。

經盧舍那言至毛頭許事。述曰：明十地中。牒問可知。

若佛子。菩提薩埵。入平等慧體性地。

此初地中。舉章門言。平等慧體性地者。平等慧者。能證智也。體性者。所證真也。地即總也。

真實法化。一切行華光滿足。四天果乘用任化無方理化。

次行相中。真實法者。內證門也。真實化者。外化門也。具此二利。言一切行真無漏。行正感佛果。言華實破闇。種名光徧證法界。言滿足。四天果者。攝報

果也。乘用任化者。世俗門化。無方理化者。勝義門化。

神通十力十號十八不共法。住佛淨土。無量大願。辯才無畏。一切論一切行。我皆得出生入佛家。坐佛性地。

於十力等皆得入者。如瑜伽云。初地已上。分得百四十不共佛法。故淨土大願者。堪住他受用土願。故一切論者。五明論也。一切行者。於彼五明多有所作。坐佛性地者。已入大地故。

一切障礙。凡夫因果。畢竟不受大樂歡喜。

一切障礙分別起障。凡夫因果惡趣北州無想天等。

從一佛土入無量佛土。從一劫入無量劫。不可說法爲可說法。反照見一切法逆順。見一切法常入二諦。而在第一義中。以一智知十地次第。一。事示眾生。而常心中道。以一智知一切佛土殊品及佛所說法。而身心不變。以一智知十二因緣十惡種性。而常住善道。一智見有無二相。以一智知入十禪支行三十七道。而現一切色身六道。以一智知十方色色分分了起。

從一佛土入無量土者。不動一國至諸國。故從一劫入無量劫者。於一念中攝三際。故或舒一劫爲多劫。故不可說法爲可說者。堪說內證甚深法。故攝法歸智。名反照見一切法。常入二諦等者。遊照二諦宅心真故。知十地次第者。地位也。一。事示眾生者。地行也。身心不變者。會一味故。十惡者。殺生等也。雖知黑品住白品故。一智見有無二相者。達三性故。分分了起者。別別了知色故。別別生起色故。

入受色報。而心心無縛。光照一切。是故無生信忍。

空慧常現在前。從一地二地乃至佛界。其中閒一切法門一時而行故。

入受色報者。趣入領受有色報故。卽不生無色也。而心無縛者。雖住靜慮。生欲界等。慧光恆照徧滿。真故。無生理中。信忍空慧常現前也。卽五忍之第一二初故。其中閒一切法門者。十度也。

略出平等地功德海。藏行願如海一滴毛頭許事。略出下結初地大海。今略出也。

若佛子。菩提薩埵善慧體性地。

經若佛子。至體性地。述曰。第二地中有三章門故。地行故。指廣故。此初舉章言善慧者。離犯戒惡故。清淨明達一切善根。所謂慈捨慧一切功德本。

經清淨明達至功德本。述曰。第二地行中有二總標故。別釋故。此初也。清淨明達一切善根者。舉行體也。謂有三種。一慈與樂爲最故。二捨離染之本故。或有經本具四無量。三慧證達之原故。一切功德本者。釋上善根名義也。

從觀入大空慧方便道智中。

經從觀入至爲苦苦。述曰。別釋有三。逆次第釋。惠捨慈故。初亦有二。觀察故。化導故。此初也。言觀

入大空慧者。謂初觀入於最勝真如大空之慧。從初入心遂起後得巧方便道智中。

見諸眾生無非苦諦。皆有識心。三惡道刀杖一切苦惱緣中生識。名爲苦諦。

見諸眾生無非苦諦。何以故。皆有識苦之心。三途乃至善趣苦緣中生識領故。

三苦相者如者。

何等爲苦。謂有三苦。言如者。相傳云相似如也。指事言故。

如身初覺從刀杖身色陰二緣中生覺爲行苦緣。

言身初覺者。五識也。從刀杖者。外緣也。從身者。內緣也。根境竝色。故言色陰二緣中生識覺故。此識名爲行苦之緣。率爾多分起捨受故。

次意地覺緣身覺所緣得刀杖及身瘡腫等法。故覺苦苦緣。重故苦苦。

次意識覺。同緣刀杖及身瘡等。引生五識相應苦受。及自憂根。名苦苦緣。重故苦苦者。釋逼迫重名苦苦也。

次受行覺。一心緣向身色陰壞瘡中生苦覺。故名爲壞苦緣。

次起第三追念意識名受行覺於前所受追緣行故於前二覺所緣身等會妙壞中生憂惱故名壞苦緣。

是以三覺次第生三心故爲苦苦苦。

是以三位識漸生三苦故爲苦苦苦。此三苦字。如次結前行等三苦。

一切有心眾生見是三苦起無量苦惱因緣故。

經一切有心至是初善根。述曰。第二化導諸有心者。見是三苦起八苦等之因緣故。

我於是中入教化道三昧現一切色身於六道中十

種辯才說諸法門。

此地菩薩入教化道三昧說諸過患令生厭背於中入定意業自在現身六道身業自在十辯說法語業自在十者傳說一自相說事相故二同相說理相故三行相四說相五智相六無我慢相七大小乘相八菩薩地相九如來地相十作住持相卽古今恆爾相也如十地論。

謂苦識苦緣刀杖緣具苦識行身瘡腫發壞內外觸中或具不具具二緣中生識識作識受觸識名爲苦識。

苦識者苦體也。於此且說四諦門故。苦緣者所依也。依自心王及根起故。刀杖緣具者。外觸境也。苦識行身瘡腫發壞者。內觸境也。以覺苦識所行執受內身觸故。刀等破身故。具二觸瘡等自生故。言不具。具所依緣生了別故。名爲生識。識作思也。識受受也。觸識觸也。如是一聚合名苦識。以隨顯勝且舉三心所。

行二緣故。心心緣色。心觸觸惱受煩毒時爲苦苦。然此苦諦差別有三。一者苦苦依根境故。言行二緣。由此念念緣身瘡等故。言心心緣色。此心觸對

觸惱之境。領受煩毒爲苦苦也。

心緣識。初在根覺緣。名爲苦覺。心作心受觸識覺觸未受煩毒時。是名行苦。

二者行苦。二苦本故。處中說。言心緣識者。名之差別。初在根發多分率爾覺所緣境。名行苦覺。思受及觸。纔覺境觸未受毒時。捨受現前。名爲行苦。

逼迫生覺如斲石火。於身心念念生滅。身散壞轉變。化識入壞緣。緣集散。心苦心惱。受念後緣染著。心心不捨。是爲壞苦。

三者壞苦。境切生苦如斲石火。謂由緣逼斲行苦。

石出壞等苦燒身心也。此有二種。刹那生滅即細壞苦。若一期身散壞轉變如幻化識於中了故言識入壞緣也。妻子珍等存名緣集彼後敗壞名為緣散。爾時心苦轉增心惱。雖現受念後散壞緣戀著前存念念不捨是為壞苦。

三界一切苦諦。

總結上云三界一切苦諦也。

復觀無明集無量心作一切業相續相連習因集因名為集諦。

次明集諦謂觀無明引集無量善惡之心作一切

業習氣相續煩惱習因諸業集因名為集諦。

正見解脫空空智道心心名以智道道諦。

次明道諦正見因也解脫果也空空智道體也謂

二空智以世閒正見為因出世解脫為果羣聖之

迹名道見修等別名心心總結名以智道道諦。

盡有果報盡有因清淨一照體性妙智寂滅一諦。

次明滅諦盡有苦果盡有集因離障清淨一味所

照體性以聖妙智擇力寂滅一諦也。

慧品具足名根一切慧性起空入觀是初善根。

慧品具足已下總結初慧善根起空者俗智入觀

者眞智。

第二觀捨一切貪著行一切平等空捨。

經第二觀捨至捨品具足。述曰。逆次第二觀捨善根。初總標云。第二觀彼捨一切貪障而行平等空之捨也。

無緣而觀諸法空際一切相。

次明行相。以無緣行觀法空際一眞如相。

我觀一切十方地土皆吾昔身所用故土。四大海水是吾故所用水。一切劫火是吾昔身故所用火。一切風輪是吾故所用氣。

又觀世俗平等之門。謂觀地土吾所已用舊故土等四大皆然。

我今入此地中法身滿足。捨吾故身畢竟不受四大分段不淨故身。

我今入此地者。離垢地也。畢竟不受不淨身者。如十住論初地菩薩於五欲中煩惱作患。上地不然。無始姪愛受胎生身所棄尸身成大地等。今於五欲不作過患。更不應受胎生身故。

是爲捨品具足。

第三次觀於所化一切眾生。



李維新曰法言卷一
經第三次觀至無量法身。述曰。逆次第三觀慈善根。

與人天樂十地樂離十惡畏樂得妙華三昧樂乃至佛樂。

妙花三昧者。一乘三昧。總攝因也。佛樂果也。

如是觀者慈品具足。

菩薩爾時住是地中。無癡無貪無瞋。入平等一諦智。一切行本。遊佛一切世界。現化無量法身。

後結成言。無癡無貪無瞋。如次結前慧捨慈品善根成也。入平等智。諸菩薩行本也。現化無量法身。

景者如水中月法身影故。

如一切眾生天華品說。

經如一切眾生天華品說。述曰。第三指廣餘地。準此。

若佛子。菩提薩埵光明體性地。

經若佛子。至名一義別。述曰。第三地名光明者。發光地故。次行相中。有二。自利故利他故。初亦有二。知能詮故。知所詮故。此初也。

以三昧解了智。知三世一切佛法門十二法品名味句。

三昧解了智者以依勝定發三慧故。三世佛法門者十二分教名。句文身徧攝能詮故。

重誦記別直語偈。不請說戒律譬喻佛界昔事。方正未曾有談說。是法體性名一義別。

重誦者應頌。此不了義對記別故。在前立二直語者契經。此唯長行對諷頌偈。故次立二不請說者自說戒律者因緣。佛界者本生昔事者本事。方正者方廣未曾有者希法。談說者論議言名一者一種名。句文故義別者開爲十二分故。是名味句中說一切有爲法。

經是名味句。至因緣果觀。述曰。第二知所詮也。分分受生。初入識胎。四大增長。色心名六。住於根中。起實覺。未別苦樂名觸識。又覺苦樂識名三受。連連覺著受無窮。以欲我見戒取善惡有識。初名生識。終名死。

分分受生者。分段生也。初入識於胎。卽識支位也。四大增長。色心者。名色支也。名六。住於根中。起實覺者。堪發識位。爲六處支故。未別苦樂名觸識者。觸支也。覺苦樂識名三受者。受支也。連連覺著受無窮者。愛支也。恆著愛故。欲謂欲取。我謂我語取。

見卽見取。戒卽戒禁取。合取支也。善惡有者。有支也。識初名生。生支也。識終名死。死支也。是十品現在苦因緣果觀。

言是十品者。除無明行支故。現者苦因緣果觀者。識等五支名現在苦。愛取有三名現在因緣。生老死二名因緣之果。能觀察彼名之爲觀。

是行相中道。我久已離。故無自體性。入光明神通。總持辯才。心心行空。而十方佛土中。現劫化轉化百劫。國土中養神通禮敬佛前。諮受法言。

經是行相中至身心則化。述曰。第二利他也。菩薩念言。於是緣生行相。以中道智。我久已離。有無著。故無自體性。知所證已。亦爲利他。入總持辯才事。佛受法現身六道。隨應說法。現劫化者。如維摩經。一日舒爲七大劫等。展轉化。故言轉化百千劫。復現六道身。一音中說無量法品。而眾生各自分分得聞。心所欲之法。苦空無常無我。一諦之音。國土不同。身心別化。

國土不同。身心別化者。隨其國欲三業別化。是妙華光明地。中略開一毛頭許。如法品解觀法門。千三昧品說。

經是妙華至三昧品說。述曰。第三存略指廣。如彼
二品已廣說故。

梵網經古迹記卷第二

梵網經古迹記卷第三

唐青丘沙門太賢集

若佛子。菩提薩埵體性地中。

經若佛子至寂滅忍。述曰。第四地。行相中有二。自
分行故勝進行故。此初也。

爾真炎俗。不斷不常。卽生卽住卽滅。一世一時一有。
種異異現異故。

梵云爾炎卽所知義。今配二諦故言爾真炎俗。離
增減故言不斷不常。如無量劫卽是一念。況生住
滅。一世一時一有。一有者。一妙有也。雖真一味因

緣不雜故言種異異。如因緣別果亦不同故言現異。

因緣中道非一非二非善非惡非凡非佛故。

既雖無相不壞假名。故言因緣中道也。既無定性名中道故。非一二等如文可知。

佛界凡界一。是名為世諦。

然隨假相佛與凡等一一差別。名為世諦。

其智道觀無一無二。玄道定品。

然勝義智道觀彼無一二。如何等法觀彼真耶。故總舉言玄道定品也。玄即所緣道謂慧也。定謂所

依。

所謂諸佛心行。初覺定因。信覺思覺靜覺上覺念覺。慧覺觀覺猗覺樂覺捨覺。

言佛心行者。舉果顯因。初覺定因者。初悟空理定。即因也。覺之因。故何等名品。謂有十種。初三如次。聞思修慧。次七證位。七覺支也。上覺精進以上昇。故觀覺定也。從果名故。猗覺安也。舊翻猗故。樂謂喜也。

是品品方便道。心心入定果。是人住定中。炎炎見法。行空。若起念定。入生心定。生愛順道。法化生。名法樂。

忍住忍證忍寂滅忍。

四地菩薩漸斷障時方便道力念念進入定果覺慧是人住定起慧炎故見世俗法行勝義空若起念定者定之親因并舉念也起者出也出前緣法緣空定者卽入有情緣心定中生慈心愛以順道法化生既愛法樂名法樂忍持德不退名爲住忍入眞名爲證忍出妄名寂滅忍名之差別也。

故諸佛於入光光華三昧中現無量佛以手摩頂一音說法。

經故諸佛至已明斯義述曰第二勝進行。

百千起發而不出定住定味樂定著定貪定一劫千劫中住定見佛蓮華坐說百法門是人供養聽法一劫住定。

於彼菩薩所入定中諸佛現影而起發故百千起發者精進法門也著定者釋住定也貪定者釋味樂定也然善法欲非貪煩惱已斷定愛故。

時諸佛光中摩頂發起定品出相進相去向相故不退不墮不住頂三昧法上樂忍永盡無餘。

發起者覺發也警彼定品三種相故菩薩定力超三有故名爲出相超二乘滅名爲進相向大乘果。

名去向相。佛光覺發出相之故。菩薩不沒生死不退涅槃。覺發進相之故。不墮二乘。覺發去向相。故不住因位。是則定品功德滿足。謂摩頂發起名頂。三昧法離沒等劣名。上樂忍功德圓備。名永盡無餘。

卽入一切佛土中。修行無量功德品。行行皆光明。

無量功德品。福也。行行皆光明。智也。

入善權方便教化一切眾生。能使得見佛體性常樂我淨。

見佛體性常樂我淨者。令心解故。餘文可解。

是人生住是地。中行化法門。漸漸深妙。空華觀智。入體性中道。一切法門品滿足。猶如金剛。

上日月道品已明斯義。

上日月下。指餘品也。

若佛子。菩提薩埵。慧照體性地。

經若佛子。至因果分別。述曰。第五地。舉章云。慧照者。始雙照故。地行有二。自分故。勝進故。初亦有二。智故。通故。此初也。

法有十種力生品。起一切功德行。

總標云。十力生品者。起一切功德行故。

以一慧方便知善惡二業別行處力品。

一以一慧至處力品者。處非處智力也。

善作惡作業智力品。

二自業智力。

一切欲求願六道生生果欲力品。

三種種勝解智力。能知六道意樂勝劣故。現行意

樂名為果欲。

六道性分別不定性力品。

四種種界智力。知種姓故。

一切善惡根一一不同根力品。

五根上下智力。

邪定正定不定是名定力品。

六靜慮解脫智力。能知凡聖定差別故。正定聖也。

一切因果乘是因乘是果。至果處乘因道。是道力品。

七徧趣行智力。能知趣果方便故。謂知乘是因必

至果處。及乘是果由乘因道故。如對法云。悟入大

小乘教所攝境故。

五眼知一切法見一切受生故。天眼力品。

八死生智力。言五眼知一切法者。類舉總數。慧法

眼等知一切法。以天眼見諸受生故。

百劫事一一知宿世力品

九宿住隨念智力

於一切生煩惱滅一切受無明滅解脫力品

十漏盡智力一切受者順現受等潤生煩惱滅發

業無明滅故

是十力品智知自修因果亦知一切眾生因果分別而身心口別用以淨國土為惡國土以惡國土為妙樂國土能轉善作惡轉惡作善色為非色非色為色以男為女以女為男以六道為非六道非六道為六道乃至地水火風非地水火風是人爾時以大方便

力從一切眾生而見不可思議下地所不能知覺舉足下足事

經而身心口至下足事述曰第二通力三業變化自在用故既從眾生現不可議下地不知覺舉足下足事

是人大明智漸漸進分分智光光無量無量不可說不可說法門現在前行

經是人大明智至現在前述曰第二勝進分行大明智者總舉也漸漸進者加行道也分分智者無間道也光光無量無量者解脫道也不可說不可

說法門勝進道也。

若佛子。菩提薩埵體性華光地。

經若佛子。至品中說。述曰。第六地舉章。云華光者。般若正因照境破闇故。

能於一切世界中。十神通明智品。以示一切眾生種種變化。

次地行中。初總標已。

以天眼明智知三世國土中微塵等一切色分。分成六道眾生身。一一身微塵細色成大色分。分知。

天眼明下。別顯十通。十通者。一天眼通知微塵數。大色分成六道眾生身。及一一身細分成大。亦分分知。

以天耳智知十方三世六道眾生苦樂音聲。非非音。非非聲。一切法聲。

二天耳通言非非音。非非聲者。傳說并知音聲空故。一切法聲者。餘一切聲。有說聞法蠶等教也。

以天身智知一切色。色非色。非男非女形。於一念中徧十方三世國土劫量大小國土中。現微塵身。

三天身通。卽神境通知一切色。及知色之非色等性。於一念中通於十方國土之量。三世劫量隨國

大小現齊爾所時塵數身故。

以天他心智知三世眾生心中所行十方六道中一切眾生心心所念苦樂善惡等事。

四天心通卽他心智。

以天人智知十方三世國土中一切眾生宿世苦樂受命。一一知命續百劫。

五天人通知人事故卽宿住智。

以天解脫智知十方三世眾生解脫斷除一切煩惱若多若少從一地乃至十地滅滅皆盡。

六天解脫通卽漏盡智。知諸眾生解脫方便故滅滅皆盡者滅十障故。

以天定心智知十方三世國土中眾生心定不定非定非不定起定方法有所攝受三昧百三昧。

已後四通皆是他心通之差別。如次知他定慧念願立爲四故。非定非不定者。以上二心體性空故。以天覺智知一切眾生已成佛未成佛。乃至一切六道人心心亦知十方佛心中所說法。以天念智知百劫千劫大小劫中一切眾生受命命久近。以天願智知一切眾生賢聖十地三十心中。一一行願若求苦樂若法非法一切求。十願百千大願品具足。

三十心者。地前心也。一切求者。於法非法求修斷也。

是人住地中。十神通明中。現無量身心口別用。說地功德百千萬劫不可窮盡。而爾所釋迦略開神通明品。如觀十二因緣品中說。

言而爾所者。但明爾所十通明者。於釋迦略說也。若佛子。菩提薩埵滿足體性地。

經若佛子。至聽法故。述曰。第七地中舉章云。滿足者。功用滿故。地行有二。實行故。化相故。此初也。入是法中。十八聖人智品。下地所不共。

言十八聖人智者。以隨分得十八不共法故。

所謂身無漏過。口無語罪。念無失念。離八法。一切法中捨。常在三昧。是入地六品具足。

古有作疏云。初六中身無漏過者。離殺盜婬業及習故。二口無語罪者。離妄語等四罪語故。三念無失念者。離貪離瞋及邪見故。乃至廣說非也。如此十惡前第二地。已永離故。今解身無漏過者。身無誤失也。口無語罪者。無卒暴音也。念無失念者。無忘失念也。離八法者。無不擇捨。羅漢由執世間八法。專求自利。捨利他事。菩薩遠離八法性故。一切

法中捨者無種種想也。於生死涅槃無差別想。由住第一大捨故。常在三昧者。無不定心也。此六入地之所滿足。

復從是智生六足智。三界結習畢竟不受故。欲具足。第二六者。一欲具足。於三界結無所怖畏。堪求所知障清淨故。言具足者。今云無減也。

一切功德一切法門所求滿故。進心足。

二精進具足。所求能滿故。

一切法事一切劫事一切眾生事。以一心中一時知故。念心足。

三念具足。遠憶諸法劫人事故。

是二諦相六道眾生一切法故。智慧足。

四慧具足。眾生者世諦也。一切法者第一義諦也。

四重之中且舉初故。

知十發趣人乃至一切佛無結無習故。解脫足。

五解脫具足。知諸解脫未得不退故。

見一切眾生知他人自我弟子無漏無諸煩惱習故。以智知他身解脫足。

六知他解脫足。卽定不退也。必由定力知弟子心亦無染故。

是人入六滿足明智中。便起智身隨六道眾生心行。是人入此中六足中。更欲起後滿分六故。便起智也。一身隨六道心行而現。

口辯說無量法門品。示一切眾生故。

二口辯說法示眾生故。

隨一切眾生心行。常入三昧。而十方大地動。虛空化華故。能令眾生心行。

三隨眾生心入定振動。言虛空化華者。以雨華故。能令眾生心有所行。上三如次三業隨智行也。

以大明具足見過去一切劫中佛出世。亦是示一切

眾生心。

四以大明具足見過去佛。亦令眾生心眼得見。

以無著智見現在十方一切國土中一切佛。一切眾生心所行。

五以無著智見現在佛等。

以神通智見未來中一切劫一切佛。世出一切眾生。從是佛受道聽法故。

六以神通智見未來佛等。此中大明無著神通者。達三世智名之差別也。

住是十八聖人中心心三昧觀。三界微塵等色是我

故身一切眾生是我父母。

經住是十八至國土中。述曰。第二化相中。先觀平等慈悲門。次量自力能。後現變化。

而今入是地中。一切功德。一切神光。一切佛所行法。乃至八地九地中。一切法門。品我皆已入故。

力能之中。一切功德者。福品也。一切神光者。智品也。一切佛所行法。等者。證果法門及勝進法門中。已入解也。

於一切佛國土中。示現作佛成道。轉法輪。示入滅度。轉化他方。過去來今一切國土中。

若佛子。菩提薩埵佛吼體性地。

經若佛子。至入心三昧。述曰。第八地中有五種行。此初定行。

入法王位三昧。其智如佛吼三昧。故十品大明空門。常現在前。華光音入心三昧。

初無功用。名入法王位三昧也。其智似果。說法定。故雖有所說。而於無相無功用住。故言似佛。下內

空等十大明慧所入定門。任運流故。諸佛得果除。闍教音入菩薩心定也。華能得果。光除闍義。

其空慧者。

經其空慧者至不可說。述曰第二慧行。

謂內空慧門。外空慧門。有爲空慧門。無爲空慧門。性空慧門。無始空慧門。第一義空慧門。空空慧門。空空復空慧門。空空復空空慧門。

謂內空等。如辯中邊智論廣說。於此第十泯第九也。

如是十空門。下地所不知。虛空平等地不可說不可說。

總結十空。性平等地。可以十門假說。而不著故。亦不可說。

神通道智。

經神通道智至一時行。述曰第三通行。

以一念智知一切法。分分別異。而入無量佛國土中。一一佛前。諮受法。

謂神通智。徧知諸事。入無量土。神通照境。如眼見色。餘真實智。達事達理。行解深細。如意識了。

轉法度與一切眾生。而以法藥。施一切眾生。爲大法師。爲大導師。破壞四魔。

轉法度與一切眾生者。以己之解。授與眾生也。

法身化化入佛界。是諸佛數。是諸九地十地數中長。

養法身。

菩薩法身示現諸化。與果相似。言入佛果。是諸佛數。況是九地十地數也。

百千陀羅尼門。百千三昧門。百千金剛門。百千神通門。百千解脫門。如是百千虛空平等門中。而大自在。一念一時行。

平等門者。陀羅尼門等所行。真如門中。而大自在。一念一時而修行也。

劫說非劫。非劫說劫。非道說道。道說非道。非六道眾生說六道眾生。六道眾生說非六道眾生。非佛說佛。

佛說非佛。

經劫說非劫。至佛說非佛。述曰。第四說行。劫空非劫。然不都無。非劫說劫。餘皆準此。

而入出諸佛體性三昧中。

經而入出。至品中已明。述曰。第五照行。諸佛體性。中三昧者。傳說果德相應故。

反照順照。逆照前照。後照因照。果照空照。有照第一。中道義諦。照是智。唯八地所證。下地所不及。不動不倒。不出不入。不生不滅。

反照者。還照自故。言順逆者。如順逆觀緣起。餘皆

隨境不動已下。明智行力。離功用。故言不動。永伏
斷染。故言不倒。恆證生空。言不出。法空不續。言不入。
中永不復受分段生死。故言不生不滅也。又不應不
是地法門品。無量無量不可說不可說。今以略開地
中百千分一毛頭許事。羅漢品中已明。

結文可解。

若佛子。菩提薩埵。佛華嚴體性地。

經若佛子。至出入無時。述曰。第九地中。言佛華嚴
者。具四無礙莊嚴行故。

以佛威儀如來三昧。自在王王定。出入無時。

地行有二。內證故。外化故。此初也。現佛威儀定。及
說法自在。王定。恆現前故。更無出入別時也。

於十方十世界中。百億日月百億四天下。一時成佛。
轉法輪。乃至滅度。一切佛事。以一心中。一時示現一
切眾生。

經於十方至海一滴。述曰。第二外化。十世界者。十
方大千故。

一切色身八十種好。三十二相。自在樂虛空同。無量
大悲光明相。相莊嚴。

所現身別相好。具足自在。無礙與虛空同。無量大

悲智慧光明福相智相莊嚴法身。

非天非人非六道一切法外而常行六道無量身無量口無量意。

言一切法外等者。非趣生法而行趣生。

說無量法門。而能轉魔界入佛界。佛界入魔界。復轉一切見入佛見。佛見入一切見。佛性入眾生性。眾生性入佛性。

轉魔界等入佛界等。性平等故。說無礙也。

其地光光照。慧慧照。明炎明炎。無畏無量。十力十八不共法。解脫涅槃。無爲一道清淨。

光光照者。二空故。慧慧者。彼後智故。明炎明炎者。無閒解脫故。備四無畏。四無量。十力。十八不共法。八解脫等。無住涅槃。不住二邊。無爲一道所知障淨。

而以一切眾生作父母。兄弟爲其說法。盡一切劫。得道果。又現一切國土。爲一切眾生相視如父如母。天魔外道相視如父如母。

爲諸眾生作父母等。說法窮劫。令得道果。

住是地中。從生死際起。至金剛際。以一念心中。現如是事。而能轉入無量眾生界。如是無量略說如海一

滴。

從生死際起者。從初發心至金剛心所有願行。於一心現入眾生界而教化也。

若佛子。菩提薩埵入佛界體性地。

經若佛子。至名佛界地。述曰。第十地中舉章云。入佛界者。受職位。故次地行中有二。行功德。故行勝利。故此初也。

其大慧空。空空復空。如虛空性平等。智有如來性。十功德品具足。

先出體用言大慧空。然二空用亦復空。故言空空。

復空。復空所取能取。既平等空。故言如虛空性平等。智有果德性。十德具足。此總標也。十者。十號。

空同一相體性。無爲神虛體。一法同法性。故名如來。一者如來清淨法界。一相無爲。其中法身神虛體。一。一切事法。泯同法性。無所去來。名如來。故然經舉義末後配名。

應順四諦。二諦盡生死輪際。法養法身無二。是名應供。

二者應供。智應順境。斷應不受。後有法身無二。應正法養故。

徧覆一切世界中一切事。正智聖解脫智。知一切法有無一切眾生根故。是名正徧知。

三者正徧知。徧覆有情及器世事。周知諸法及有情故。正覺所知名爲正知。無所染著名聖解脫智。明明修行佛果時足故。是明行足。

四者明行足。因行增明已到滿故。

善逝三世佛法法同先佛去佛去時善善。來時善善。是名善逝。

五者善逝。善逝於三世佛法。其所至法同於先佛。佛去世時多有所益。言去時善善。來現世時亦有

所益。言來時善善。名善善者。結善逝也。

是人行是上德。入世閒中教化眾生。使眾生解脫一切結縛。故名世閒解脫。

六者世閒解。菩薩修行上說五種德行。入世閒中教化眾生令解脫故。

是人一切法上入佛威神儀形如佛。大士行處爲無上士。

七者無上士。諸行法上入威神似佛所行義形處故。

調順一切眾生故名爲丈夫。

八者調御丈夫。爲世閒解脫調順眾生。剛強煩惱故。

於天人中教化一切眾生。諮受法言故。是天人師。

九者天人師。彼所諮受法言師故。

妙本無二。佛性玄覺。常常大滿。一切眾生禮拜故。尊敬故。是佛世尊。

十者佛世尊。法身無二。智身恆時大滿。名佛。一切禮拜及所尊敬。名世尊故。

一切世人諮受奉教。故是佛地。是地中一切聖人之所入處。故名佛界地。

次總結釋佛界地名。一切世人受教之處。是故此地是覺地也。下地來入。亦名界地。能持羣聖圓滿處故。

爾時坐寶蓮華上。一切與授記。歡喜法身。手摩其頂。經爾時至。與佛道同。述曰。第二行勝利。十地菩薩坐蓮華上。蒙法身佛授記摩頂。

同見同學菩薩異口同音讚歎無二。又有百十億世界。中一切佛一切菩薩。一時雲集。請轉不可說法輪。虛空藏化導法門。

及蒙同見同學讚歎。言法身者。如隔輕縠。見報身。

故內德已滿更得一切佛菩薩請轉法輪饒益世間所轉法輪名虛空藏周徧容受化導門故。

是地有不可說奇妙法門品奇妙三明三昧門陀羅尼門非下地凡夫心識所知唯佛佛無量身口心意可盡其源如光音天品中說十無畏與佛道同。

爾時盧舍那佛爲此大眾略開百千恆河沙不可說法門中心地如毛頭許。

經爾時至一心而行述曰第五付屬也不可說數名也此數爲一積至百千恆沙法門恆河者香山頂無熱惱池流出四河此東河水寬四十餘里梵

語應言宛伽無別正翻義天堂來河源山頂人所不見如俱舍云無通不能至但見彼水高樹而下時俗遂言天堂來也此一河沙爲一數量至百千故就彼門中今此第十心地品者如毛頭許。

是過去一切佛已說未來佛當說現在佛今說三世菩薩已學當學今學。

佛付屬言三際佛菩薩之所說學。

我已百劫修行是心地號吾爲盧舍那。

我已多劫修故成佛。

汝諸佛轉我所說與一切眾生開心地道。

時蓮華臺藏世界赫赫天光師子座上盧舍那佛放
光光。

放光非一。故言光光。

告千華上佛持我心。地法門品而去。復轉爲千百億
釋迦及一切眾生次第說我上心地法門品。

告千華上淨穢土佛。汝各轉化一切眾生。佛等展
轉說也。

汝等受持讀誦一心而行。

爾時千華上佛千百億釋迦。從蓮華藏世界赫赫師
子座起。各各辭退。舉身放不可思議光。光皆化無量

佛。一時以無量青黃赤白華。供養盧舍那佛。受持上
所說心地法門品竟。各各從此蓮華藏世界而沒。

經爾時千華至世界而沒。述曰。自下大段第二化
傳說中。有二報恩故。別化故。此初也。法可重故。

沒已。入體性虛空華光三昧。還本原世界。閻浮提菩
提樹下。從體性虛空華光三昧出。

經沒已。至品中說。述曰。第二別化也。各還本土。別
化眾故。於中有二。傳上賢聖內門行故。傳初發心
外門戒故。初亦有二。經家總序故。別釋故。此初也。
其三昧名如前已釋。大小乘機所見不同。菩薩眾

見初成佛已往第四禪大自在天王宮放光接眾事盧舍那聽心地品還來樹下出定而說十世界海菩提樹者畢鉢羅樹在伽耶城西南二十四里出已方坐金剛千光王座及妙光堂說十世界海

金中精牢名曰金剛可宜金剛體之座也光中最勝名光王座妙光堂者卽華嚴云普光堂也因佛放光而立名也在摩伽陀國寂滅道場界去菩提樹三里也滅生死處名寂滅道場十世界海者華嚴第二云蓮華藏世界海次東方有世界海名淨勝光莊嚴中有佛刹名眾寶金剛藏如是十方各

說異名廣如彼說除蓮華藏言十世界海世界海量如前已說

復從座起至帝釋宮說十住復至燄天中說十行復從座起至第四天中說十迴向

十住十行十迴向者卽前所說十發趣等

復從座起至化樂天說十禪定

十禪定者此文次第當四善根一向修慧故偏說定禪那此云寂靜其十者何如華嚴經十定品說善戒經第六禪品中有十寂靜淨禪一世法寂靜淨禪等彼十何義頌曰漏無漏近分根本與勝進

入住出邊際。決擇分爲十。

復從座起至他化天說十地。復至一禪中說十金剛。準此上卷十金剛者卽十迴向。四天中說何故色界重說迴向。北并州真藏師云。色界所說諸位通行。如華嚴三十九說十金剛心。謂菩薩發如是心。我當覺了三世一切諸法。悉無有餘。是第一發金剛心。乃至廣說。

復至二禪中說十忍。

十忍者。瑜伽忍品云。清淨忍有十。如彼廣說。又善戒經忍品說十。

復至三禪中說十願。

十願者。如華嚴說發菩提心經。下當引釋。

復至第四禪中摩醯首羅天王宮說我本源蓮華藏世界。盧舍那佛所說心地法門品。其餘千百億釋迦亦復如是。無二無別。如賢劫品中說。

爾時釋迦從初現蓮華藏世界東方來入天宮中說。魔受化經已。

經爾時釋迦至八千返。述曰。第二別釋。謂有疑云。從初成佛何時說耶。故今釋云。此化釋迦初蓮華界從本佛現。自東來入兜率天宮說魔受化經已。

下生入胎乃至號吾釋迦牟尼佛。此舉成道也。餘諸經云樹下降魔。云何此經魔受化已方始下生。解云。魔眾非一化有前後。如大集經云。魔王有百億。若一已伏更無餘者。佛滅後度誰亂結集。爲顯力勝時時降魔。如華嚴云。爲顯菩薩功德之力。不可壞故。

下生南閻浮提迦夷羅國。母名摩耶。父字白淨。吾名悉達。

下閻浮提者。入胎相也。梵云瞻部。此云勝金。如阿含經。閻浮提品。閻浮樹下有金厚四十由旬。號曰

勝金。金中勝故。卽閻浮檀金也。摩訶摩耶。此云大術。

七歲出家。三十成道。號吾爲釋迦牟尼佛。

七歲出家等者。此經應錯。旣說娶嫁。方出家。故西域傳云。諸部見聞不同也。其正義者。如金光明記。於寂滅道場。坐金剛華光王座。乃至摩醯首羅天王宮。其中次第十住處所說。

寂滅道場已下。顯時。謂成佛已。從第四禪事。盧舍那受心地法。還來道場。說十世界海。如次前說。歷十住處。

時佛觀諸大梵天王網羅幢。因爲說無量世界猶如網孔。一一世界各各不同。別異無量。佛教門亦復如是。吾今來此世界八千返。

乃至第十摩醯首羅天王宮中說心地時。諸大梵王供網羅幢。因此說法。乃至告言。吾今來此世界八千返。

爲此娑婆世界坐金剛華光王座。乃至摩醯首羅天王宮。爲此中一切大眾略開心地竟。

經爲此娑婆至一戒光明。述曰。大段第二誠惡行門。於中有三。開序故。正說故。流通故。初亦有三。時

處故。勸策故。結戒故。此初經家序時處也。爲化此娑婆界。從金剛座乃至四禪所化類故。說心地竟。復從天王宮下至閻浮提菩提樹下。爲此地上一切眾生。凡夫癡闇之人。說本盧舍那佛心地中初發心中常所誦一戒光明。

復還樹下始說。如下菩薩戒本。戒破罪闇名爲光明。

金剛寶戒是一切佛本源。一切菩薩本源。佛性種子。經金剛寶戒至自性清淨。述曰。第二法王勸策。於中有一。策發故。勸信故。此初也。佛舉戒云。金剛寶

者堅牢能持一切功德令不漏失。破諸惡故。因果萬德以戒爲初。名曰本源。如下廣釋。佛性種子者。戒實性也。

一切眾生皆有佛性。一切意識色心是情。是心皆入佛性戒中。當當常有因。故有當當常住法身。

意謂末那識卽六識心。謂第八色卽五根。凡有如是情及心者。皆入佛性當得作佛。所以者何。當當常有因。故有當當常住法身。三菩提因。重言當當。其當果因法爾有。故有當當報化。及常住法身。

如是十波羅提木叉出於世界。是法戒是三世一切眾生頂戴受持。吾今當爲此大眾重說十無盡藏戒品。是一切眾生戒本源自性清淨。

如是十戒出於世界等者。釋迦傳說出現於世。則是法戒應受持也。由此顯自佛性果故。故今爲此大眾傳說。言一切眾生戒本源自性清淨者。舉戒實性表諸眾生皆有佛性。故得成佛也。

梵網經古迹記卷第三

扶輪盤古教請發後三

實其去始以至者百轉苦海殊無由

大眼轉輪言言世界本無自到而到時來

眼去無源安許此由也眼自轉轉果效道令

眼去千眼出代世眼轉轉眼轉轉用度亦其

品眼一四眼至無本則曰轉轉轉

眼去眼轉轉轉轉轉轉轉轉轉轉轉轉轉轉

